



Malbikunarstöðin Hlaðbær-Colas hf.
Gulhelli 1
220 Hafnarfjörður

UMHVERFIS- OG
AUÐLINDARÁÐUNEYTIÐ

Skuggasundi 1 101 Reykjavík
sími: 545 8600 postur@uar.is
umhverfisraduneyti.is

Reykjavík 8. maí 2020
Tilv.: UMH20030104/8.14

Ráðuneytið vísar til erindis yðar frá 30. mars sl. þar sem sótt er um tímabundna undanþágu frá ákvæði um umfang starfsemi í gildandi starfsleyfi sem gefið var út 3. desember 2014 og gildir til 31. desember 2030 fyrir rekstur Malbikunarstöðvarinnar Hlaðbær-Colas hf., Óseyrarbraut 16 í Hafnarfirði, á meðan unnið er að gerð nýs starfsleyfis. Fram kemur í framangreindu erindi að sótt hafi verið um nýtt starfsleyfi vegna stækkunar bikstöðvarinnar, þar sem verið sé að byggja nýjan 3700m³ tank sem bætist við fyrri starfsemi. Öllum umbeðnum gögnum hafi verið skilað inn vegna umsóknarinnar. Óskað sé eftir að fá að hefja notkun á nýja tanknum þó ekki hafi enn verið gefið út starfsleyfi fyrir þessi auknu umsvif í bikstöðinni. Ástæða umsóknar sé sú að talið er óöruggt í ljósi ástandsins í heiminum í dag og ástandsins hjá bikbirgja, Nynas, að bíða eftir útgáfu nýs starfsleyfis áður en fyllt verður á nýja tankinn. Eftir að Malbikunarstöðin Höfði hf. hafi þurft að loka sínum biktönkum sé Malbikunarstöðin Hlaðbær-Colas hf. eini aðilinn sem geti tekið á móti biki á höfuðborgarsvæðinu og því mögulegt að bikskortur verði á Íslandi í sumar sem hefði þá bein áhrif á mögulega vegagerð takist ekki að tryggja nægilegt magn af biki sem fyrst.

Í 1. mgr. 6. gr. laga nr. 7/1998 um hollustuhætti og mengunarvarnir er kveðið á um að allur atvinnurekstur, sbr. viðauka I–V, skuli hafa gilt starfsleyfi, sbr. þó 8. gr. Ráðherra er heimilt, ef ríkar ástæður mæla með og að fenginni umsögn Umhverfisstofnunar og eftir atvikum heilbrigðisnefndar að veita tímabundna undanþágu frá starfsleyfi. Ráðuneytið sendi erindið til umsagnar Umhverfisstofnunar með afriti á Heilbrigðisnefnd Hafnarfjarðar- og Kópavogssvæðis.

Í umsögn Umhverfisstofnunar sem barst ráðuneytinu með bréfi dags. 17. apríl sl. kemur fram að um sé að ræða beiðni um undanþágu til að nota megi nýjan geymi í bikbirgðastöðinni við Óseyrarbraut 20 í Hafnarfirði á meðan unnið verður að starfsleyfi sem nái yfir starfsemina með þessari viðbót inni. Þetta fælist í því að veita tímabundna undanþágu frá skilyrði 1.2 í starfsleyfi Malbikunarstöðvarinnar Hlaðbær-Colas hf. að Óseyrarbraut 16 þar sem mælt sé fyrir um heimild til að taka á móti og geyma í stærsta geymi allt að 2200 m³ af biki (bitumen) eða önnur olíuefni sem eru ætluð til malbiks og olíumalarframleiðslu, þannig myndi rekstraraðili líka geta notað nýjan og stærri geymi við Óseyrarbraut 20 sem eigi að koma til viðbótar starfseminni við Óseyrarbraut 16. Starfsemin að Óseyrarbraut 16 hafi verið á svæðinu um árabil. Ekki sé fyrirhugað að breyta starfseminni með öðrum hætti en að bæta við geymslurýmnd fyrir birgðirnar sem geymdar séu á staðnum. Umsókn um starfsleyfi hafi borist og Umhverfisstofnun meti þá umsókn fullnægjandi og staðfesti að öll gögn fylgi sem til þurfi og því hægt að hefja gerð starfsleyfisins. Rekstraraðili hafi gilt starfsleyfi, skv. 7. gr.,

sbr. II. viðauka laga nr. 7/1998 um hollustuhætti og mengunarvarnir og 6. gr., sbr. IX. viðauka reglugerðar nr. 550/2018 um losun frá iðnaði og mengunarvarnir, til að taka á móti og geyma í stærsta geymi allt að 2200 m³ af biki (bitumen) eða öðrum olíuefnum sem ætluð séu til malbiks og olíumalarframleiðslu. Rekstraraðili hafi sætt mengunarvarnaeftirliti Umhverfisstofnunar og ekkert frávik hafi verið skráð í eftirliti árið 2019. Eitt frávik sé útistandandi frá árinu 2017 er varði botnþykktarmælingu. Nýtt starfsleyfi muni ekki kveða á um slíka mælingu með sama hætti vegna breyttra ákvæða í reglugerð nr. 884/2017 um varnir gegn olíumengun frá starfsemi í landi. Þar sem starfsemin sé í eðli sínu sú sama og verið hafi en aðeins í auknum mæli og með tilliti til að umsóknargögn hafi borist eins og krafist sé í ferli starfsleyfisumsókna, þ.m.t. deiliskipulag og skýrsla um grunnástand, telji Umhverfisstofnun ekki vera neitt því til fyrirstöðu að veita umbeðna undanþágu og að ríkar ástæður mæli með því. Umhverfisstofnun hafi ekki athugasemdir við þær röksemdir fyrir beiðninni sem rekstraraðili tilgreini að öðru leyti í umsókn sinni.

Í ljósi framangreindrar umsagnar Umhverfisstofnunar, að fullnægjandi umsókn um starfsleyfi hefur borist stofnuninni, að ríkar ástæður mæli með undanþágu vegna yfirvofandi skorts á biki vegna núverandi ástands í heiminum og í samræmi við ákvæði 1. mgr. 6. gr. laga nr. 7/1998 um hollustuhætti og mengunarvarnir fellst ráðuneytið á að veita Malbikunarstöðinni Hlaðbæ-Colas hf. kt. 420187-1499 tímabundna undanþágu frá skilyrði 1.2 í starfsleyfi Malbikunarstöðvarinnar Hlaðbæ-Colas hf. að Óseyrarbraut 16 þar sem mælt er fyrir um heimild til að taka á móti og geyma í stærsta geymi allt að 2200 m³ af biki (bitumen) eða þau önnur olíuefni sem eru ætluð til malbiks og olíumalarframleiðslu og að rekstraraðili geti líkað notað nýjan og stærri geymi við Óseyrarbraut 20 sem á að koma til viðbótar starfseminni við Óseyrarbraut 16. Undanþágan er veitt a því tilskildu að fyrirtækið uppfylli að öðru leyti ákvæði eldra starfsleyfis sem Umhverfisstofnun gaf út 3. desember 2014 og lög og reglugerðir sem um starfsemina gilda, sérstaklega ákvæði laga nr. 7/1998 um hollustuhætti og mengunarvarnir og reglugerða settra á grundvelli þeirra. Undanþága þessi fyrir nýja geyminn gildir þar til nýtt starfsleyfi verður gefið út en þó eigi lengur en til 1. janúar 2021.

Framangreint tilkynnist hér með.

Fyrir hönd ráðherra

Sigurbjörg Sæmundsdóttir

Agnar Bragi Bragason

Afrit:
Umhverfisstofnun
Heilbrigðisnefnd Hafnarfjarðar- og Kópavogssvæðis